

www.BibleForChildren.org

Matiu 26



Melengien
tei e he sav
(6) diamu ni
Anien te Tavien,
Iesu be metimal te
hal Betani. Ba misao
ni Lasaros e tim san,
moletin xa tepol ni
temea rilomun ra
maten. Di, Meri nggur
valit vokon tei xa lapol
ni ni nard xa mani nen
be nesao pupu.



Be sangas
visal Iesu
e mitahi ba xat
le Iesu tangan
vamerere ni. Di,
Meri misihi moten
len ni hilin. Melele xa
pol ni mak, vut vokon
xa bos xiak nggur
sen rute xil vus e nim.



Di, Sudas Eskariot, xa be tei e xil xa labe lu e le tei (12) na Iesu, ba pus vat xil na pris xil tangan vapol ni suse xa vasa rat Iesu mi xil vaxo en. E melele xa lalong sepinien nan, lamaal pupu e labit xati xa lixale ven. Mak, ma Sudas ba di milang ni mesal xa bos tangan isa rat Iesu ihe hexil ixo en.




Ma moletin nan xil laba e lapol
ni nggoni ngan taxa Iesu
tehiteni mi xil. E rute ak, xil
lasak mesen Anien te Tavien
en. E melele xa di langganien,
Iesu nggur beret e memes
Hi ven. Di, bul pasi, e melele
xa di miseti mi moletin
nan xil, xi
biteni bit,
"Muhuri mua
ni. Ngan ak
be tiei navan."



Di, Iesu nggur kap xa uaen ba
en, memes Hi ven, e melele
xa misa ni mi xil, xi biteni bit,
"Xamim vus mumu ni. Uaen
ak be ra navan xa isak ni
hitxatien hu te xeih na Hi mei
istal e ihe reitin. Reok xa
ileh ve moletin xil holu
ihe sanien tei iha
mi Hi tangan
naketeh ti
mun nasa mi
xil ve tesaen
nae xil."



Di, Iesu biteni mi Saemon Pita bit, “!Saemon,
Saemon, uteong ni nou! Temat tesis Hi tangan isak
pis xamim vus, e Hi temaen ni tangan wakil ti
reitinen te neketen namim. E inou natesis ve xouk,
Saemon, tangan neketen nam navus relinguk ti. E
melele xa uhiles meulien nam e neketen nam imei
ixeih mun, ha
ututou ni tumali
xil tangan
neketen nae
mun mei
ixeih.”



E Pita mitamea e biteni mini bit, “!Suv, inou nabue xat nou tangan nihe nim te xeih itelak e nimat itelak!” E Iesu bit rilomun ni mini bit, “Nabiteni minuk Pita, melele xa tuto nakora ti mu e ut nalan ti mu, e xouk umuun xole ihe vatol (3) xa otakil ti nou.”



Di, Iesu be rute tei xa
lakesi ni Ketsemani del
moletin nan xil. Melele
xa laduxoh rute ak, xi
biteni mi xil bit,
"Mutotan muti tak e ti
mutatil nou. Inou nitiamu
niha nisis inggaxor." Misak
ni, xi misis bit, "Tata navan
li, xosxa suse sav tova mun
da tamu, uhur rat longpangasien
ak ihe reling nou li. E onapol
ni ti naxoni ngan xa inou
ieok bei, e upol ni ixoni ngan
xa xouk kestang iem bei."




Ma, melele xa Sudas ba tangan vapol ni suse xa isa rat Iesu ha ihe he elu nan xil ixo en, xi del tatit moletin te vaeen tei te hal Rom, del xat merekete h xil te Nim Eo xa vat xil na pris xil e Farasi xil latesil xil laba. Xil lamei del laet nae xil, e di langgur xat tiei e homenda te vaeen nae xil. Tei xil milihi rat tiei nan e da xoteh vurang metu na slev tei na vatixar na pris xil. E Iesu misel mini bit, "!Ei, pipin!" Di, mitang duxol vurang moletin ak e misak ni vurangen mei bos rilomun.



Xil ladal xat Iesu e ladelu ba be
nim ma vatixar na pris xil. E
Pita di mika xus e di
nggusil xil. Melele xa
laduxoh nim ak,
lasahan upang tei di
minggan e hilaep
te vloh teni. Ma
Pita ba mos del
ngan xil xa di
ladotan xorelisi.



Di, slev tei na vatixar
na pris xil misisi bit,
"E tave xouk ti iaxa
natepus xouk oteta
tetel Iesu e urvatiei
te olip?" Slev ak be
vatimol na slev na
vatixar xa Pita teta xoteh
vurangen. E be vatol nen,
Pita muun xole bit, "E-e,
tenave nou ti." E melele nen
tak vari, tuto mikorat. Ma
Pita milonge misa xa misa e
mistal be reling vangit vloh
ak, ba di muis nggeih.




Vat xil na Siu xil vus xa ladi e kot
lamea e ladel Iesu ba misoh pe met
Suv Paelet xa be vat te kavmen e
provins te hal Sudea. Ma Paelet
misis Iesu bit, "?Midep?
?Be reitin xa xouk
iaxa obe suv toto na
Siu xil?" E Iesu bit
rilomun ni bit, "Nggoni
ngan taxa obiteni."



Paelet ien bei tangan vamaen
Iesu vaha ven vamase, ma biteni mi
vanut moletin xil ak vatei mun bit,
"!Nimaen Iesu ha ven imase!"
E moletin xil lakei
nggeih pilei sung
labit, "!Ti xati e
eivave! !Ti xati e
eivave!"




Ma, Paelet misa rat Iesu be he
moletin te vaeen nan xil tangan litela
iha e liti xati e eivave. Ma, moletin te
vaeen ladel Iesu, e langgeih xati
tangan vapo tasen ni eivave nan. Xil
laba labe 'Von Valvat Moletin' xa
lakesi ni 'Kolkota' e sepinien Hibru.



E rute ak vari, ladi xat Iesu en.
Ladi xati de hilaep na moletin lu
mun xa lateti xat xalu
lutete eivave nalu
e rin xalu.



Di, kaliko xa dakoe xol ut eo te Nim Eo na Hi mesel e hilaep be rin lu. E melele nen ak, Iesu mikei be nesao mi Hi bit, "Tata, naling meulien navan de hem." Melele xa biteni mak, Iesu milihi kor ni votiang, di, mat.



E moletin tei be visal suv Paelet,
hisen Siosep te hal Aramatea.

Xi tehe vat tei na Siu xil xa
di tetotan e kot na Siu
xil, e Siu xil lamerere
ni. E xi mun di datil
melengien xa Hi
imei istal ihe suv
toto na moletin
xil.

E melele xa ba
miso pe met
Paelet, ulin takan
ti e misisi tangan
vamaen tiei na
Iesu mini.



Ma Siosep ba, minggal kaliko tei xa
mieh. Di, ba po rat tiei na Iesu
ra eivave. Xi pis xole ni
kaliko te mieh tei. Di,
poe ba, milingi de
vangihat te tehinen
tei xa lateseh
moten rohon
ni tang.

Di, midivin hat
tei xa eilep mei
dakoe xol puiteh
te vangihat ak e
be relingi ba.



Melele xa ut milan e Sabat, vat xil na
pris xil del Farasi xil ba lopus suv
Paelet. Xil lamei visali e
labiteni mini labit, "Suv,
manem xati xa melele
xa vat luvosen ak
temeul tamu teta,
xi tehiteni tehit,
'Melengien tol mei

itavi, e
inou nimea
rilomun ra maten."



Ma laba vituei del moletin te vaeen
xil ak, e labilit xol hat xa
mahulong xa dakoe xol
puiteh teni ni tan
tepili. Di, laling tatit
moletin te vaeen
xil ak tangan xil
liketeh xole.



Sabat bus. Di, ut milan e Sande, Meri
te hal Makdela del Meri sav mun
luba tangan ha lalosao ni
vangihat te tehinen na
Iesu. Vatei takes, lul tei
milil nggeih vengan
masxaxa tei na Hi
Suv nggo ut nesao
bemei etan.



Xi mei midivin rat hat xa tetakoe
xol puiteh, e dotan da en.

Melele xa moletin te
vaeen xil lapusi, ulixil
mikan pupu e lexil
malili. Lakiri labe
tan e iexil bon
pupu, lasakras
mun lapol ni ti
neta.



E masxaxa ak biteni mi atou xalu ak bit, "Ulimil nakan ti! Nakila xa di mullang ni Iesu xa lateti xati e eivave. E xi tara ti mun inggak. Reitin, xi temea rilomun ngamu ra maten nggoni ngan taxa tehiteni.

Lumei ha lupus ti rute xa lateling tiei nan teta en."




Ma rumali lube reling vangihat
e luloh temanon luba tangan
ha lalihithiteni mi moletin xil
na Iesu. Ulixalu mikan, e
tave ti neta xa mak, iexalu
polu ni sien.



Melele xa di tamu luba, vatakes,
Iesu bisu mi xalu e biteni mi
xalu bit, “!Bos makoe! Tomat
na Hi iti mi xamil.” Melele xa
lupusi, lumei visali, lumot
ludal xat len xalu, e lusa
merereen nalu mini.





Di, Iesu mei mistal mi moletin tei e le tei (11)
nan e melele xa xil ladotan e di langganien, e bul xat
xil vengan xa vatixil nggeih pupu. Reitin, bul xat
xil vengan xa neketen nae tapin ti e latake reitin ti e
sepinien na ngan xil xa latehiteni xa latepusi temea
rilomun ra maten. Melele xa Suv Iesu bit sepinien ak
bus, e xil dit tamu lapusi, Hi nggur rat Iesu be ut
nesao, e ba dotan de ri metu na Hi.



E vengan xa eheien na Hi di e moletin
xil vus te ut etan holu xa holu pupu, xi
temaen xoteh meulien na Natneli xa
be siskes nan tangan ngan xil vus
xa laneket en lasakras lakesae,
e ha lihur meulien
sal sung.



Rom 3:23 Vengan xa moletin xil vus lapol misa, lasakras latuxoh hosien xa eilep xa Hi teling xati tangan moletin xil liti en.

Rom 6:23 Vengan xa huit polien te tesaen nar xil be maten. E Hi di misa meulien sal nggoni sanien tei mi xir vus xa di rabisti del Iesu Kristo, Suv nar.

Hibru 9:27 Hi teling xati xa moletin xil vus lilel vatei takes. E itutou sung, xil lisoh pe meten e kot nan tangan ilepis rin nae xil.

Efeses 2:8 Io, texo eheien hos na Hi kestang, xi teteh meulien e xamim vengan xa di muling nenesien namim e Kristo. Mutahur meulien sal ti vaxo neta tova xa xamim tang di mupol ni. E-e, meulien sal ak be sanien tei xa Hi vari iaxa di misa ni.



Efes 2:9 Reitin, meulien ak tave huit polien
na moletin ti tangan ti vasep koai ven.

Rom 10:9,10 Vengan xa xosxa mubit rati nggo
vulongomim xa Iesu be Suv namim, e muke reitin en nggo
tinemim xa Hi tesak ni teme rilomun ra maten, Hi iteh
meulien e xamim. Vengan xa melele xa moletin tei mike
reitin nggo tinen, Hi pusi nggoni ngan xa momal ngamu pe
meten. E melele xa bit rati nggo vulongen, Hi di
mitech meulien en.

Sion 3:16 E vengan xa eheien na Hi di e moletin xil vus te
ut etan holu xa holu pupu, xi temaen xoteh meulien na
Natneli xa be siskes nan tangan ngan xil vus xa laneket
en lasakras lakesae, e ha lihur meulien sal sung.



Sion 3:17 Hi tenasa Natneli ti tenamei e ut etan tangan
valepis rin na moletin xil e vasa pangasien mi xil ve
sexien tesa nae xil. E-e, Hi tesa Natneli teme i tangan
vahe suse xa iteh meulien na moletin xil te
ut etan ixo en.

1 Sion 5:11-13 Naha xa Hi di biteni mak: Hi misa meulien
sal mi xir, e tepol ni Natneli mei be suse teni. Mak, ma
moletin xa bisti del Nat Hi, xi nggur meulien sal. E
moletin xa tavisti ti vatel Nat Hi, xi tahur ti meulien sal.
Di nadis bat mi xamim xa muke reitin e Nat Hi tangan
mukila xa di munggur meulien sal ngamu.



Matiu 26-28; Luk 22-24; Sion 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Ambrym. SouthEast Bible (tvk) © 2015, Wycliffe Bible
Translators, Inc. All rights reserved.

<https://live.bible.is/bible/TVKWBT/MAT/1>

©2026 Bible for Children, Inc.

www.M1914.org

www.bibleforchildren.org

